

疾令禮曹差退冊封之日○贈故叅判李命俊議政府左贊成溫陽郡守趙克
善上䟽言李命俊一生清白舉世所知宜有褒獎之典事下吏曹吏曹請贈職
且錄用其子孫從之○講書院啓曰本院及衛從司乃是新設之司其節目
及處所請令禮曹定奪禮曹啓曰講書院官負於世孫凡言語文書出納之際
用白字其印信宜令工曹鑄成且考諸實錄中講書院衛從司俱以兼官填差
而無實官則其時開局入直之事有未可知而既無可據不可不隨時酌處請
講書院衛從司設於昌慶宮兵曹令各一員輪次入直答曰依啓衛從司則
勿令入直○癸巳夜東方有赤氣如龍蛇○甲午上引見大臣及備局堂上
領議政金自點曰諫院劄辭措語失當聖教使之刪去則宜矣而但無改書
還入之教劄中語多切實宜令還入上曰所以出給者使之刪去未安之語
而臺諫等不為改入未知其意也自點及左議政李景奭合辭對曰聖教至
當臺諫之退待非矣上曰雖臺諫豈無安設之言自點曰惶恐退待豈有他
腸自上若使之刪去還入則不亦可乎上曰可使之改入李景奭曰臣竊
見奢侈成習世道大變輿僮賤品綺羅遍身將朝廷無章之致歟抑宮禁之間
有侈靡之習而然歟上曰卿言是矣凡事自上達下此由闕內不克儉之致